

MODIFICACIÓN DO REGULAMENTO ELECTORAL XERAL DA USC

Consello de Goberno de 21 de febreiro de 2014

A recente aprobación dos Estatutos da USC por Decreto 14/2014, do 30 de xaneiro, polo que se aproban os estatutos da Universidade de Santiago de Compostela (DOG do 12 de febreiro), fai necesario axustar o Regulamento Electoral, para adaptar as súas disposicións ao texto estatutario.

Con todo probabilidade resultará necesario realizar un novo regulamento electoral conforme as directrices que fixe o Claustro, pero esta tarefa debe facerse de xeito sereno e con tempo para a reflexión. Non obstante, tendo en conta que estamos en cernes dun procedemento electoral moi importante, como son as eleccións a Claustro e a Reitor da Universidade, óptase por realizar os mínimos axustes posibles sobre o xa existente, para poder realizar as eleccións cun marco normativo adaptado a nova norma.

Neste senso, os piares fundamentais do cambio son: a adaptación dos sectores ao texto estatutario e a eliminación de artigos que son consecuencia das reformas da LOU producidas dende o ano de aprobación do Regulamento electoral.

Por último, e para facilitar a comprensión do texto, acórdase non só facer modificacións puntuais senón aprobar o texto refundido do Regulamento facilitando así a súa consulta.

Por todo o anterior, o Consello de Goberno do 21 de febreiro de 2014, Acordou:

Modificar os seguintes artigos do Regulamento Electoral Xeral, que quedan redactados do seguinte xeito:

Artigo 3.1. Electores

c) Os investigadores en formación segundo o artigo 31 dos Estatutos da USC.

d) Os estudantes matriculados na USC en estudos conducentes á obtención de títulos que teñan carácter oficial e validez en todo o territorio nacional ou en titulacións propias de carácter superior.

Artigo 11. Colaboración dos órganos de goberno

1.- Os órganos de goberno e unidades de administración da Universidade colaborarán coa administración electoral na preparación e xestión dos procesos electorais.

2. Sen prexuízo das funcións atribuídas á Secretaría Xeral en materia electoral polo presente regulamento, os órganos de goberno unipersoais das facultades e escolas e dos departamentos, e en especial as súas secretarías, serán os encargados de preparar e xestionar os procesos electorais nos seus respectivos ámbitos de competencia nas condicións que estableza a

Comisión Electoral Central. En particular, de ser o caso, terán como funcións, dentro dos ditos ámbitos:

- a) O rexistro dos candidatos e a elaboración dos listados provisionais de candidatos cando así o estableza a Comisión Electoral Central, así como a súa remisión a esta.*
- b) A elaboración das papeletas de votación conforme aos criterios establecidos polo presente Regulamento e pola Comisión Electoral Central.*
- c) A provisión dos medios materiais para o correcto desenvolvemento das eleccións.*
- d) A designación dos electores que estimen máis adecuados para formar parte das mesas electorais no suposto de inasistencias á constitución destas e durante o curso das votacións.*
- e) A elaboración dos listados e táboas provisionais de resultados cando así o estableza a Comisión Electoral Central, así como a súa remisión a esta.*

Artigo 13. Adscrición ás circunscricións

4.- b) Os investigadores en formación estarán censados no centro no que impartan docencia, sendo de aplicación as regras do apartado 2 deste artigo. Os estudantes de terceiro ciclo estarán censados no centro onde teña a súa sede o Departamento ao que pertence o director ou titor da súa tese.

5.- Os estudantes estarán censados no centro ou centros responsables da titulación ou titulacións en que estean matriculados e nos departamentos que teñan a súa docencia asignada ás materias nas que estean matriculados.

7.- Para os efectos de constituír os consellos científicos, estarán censados en cada instituto de investigación os doutores e titulados superiores vinculados ao mesmo segundo determine o seu regulamento de réxime interno e, no seu defecto, os que presten servizos no instituto.

Artigo 16. Cómputo de prazos e procedemento

1.- Nas eleccións ás que se refire o artigo 1, considéranse inhábiles os meses de xullo, agosto e setembro, así como os festivos previstos con carácter xeral para toda a Universidade no calendario laboral. Así mesmo, no cómputo dos prazos das eleccións reguladas no Título Segundo, así como para a data de votación nas eleccións reguladas no Título Terceiro, serán tamén inhábiles as restantes datas nas que estea suspendida a actividade académica docente e por exames ordinarios en toda a Universidade segundo o calendario académico aprobado polo Consello de Goberno. Nas eleccións reguladas no Título Segundo estarase ademais ao disposto no apartado 3 do artigo 23.

Artigo 20. Principios xerais

2.- Para o desempeño de cargos estarase ao disposto nos Estatutos da USC.

Artigo 21. Perda da condición de cargo unipersoal

2.- Segundo o disposto no artigo 71.2 dos Estatutos, en ningún caso se poderá exercer a titularidade de máis dun órgano de goberno unipersoal, nin a de calquera deles simultaneamente coa de órganos de goberno unipersoais doutra universidade ou do Consello Superior de Investigacións Científicas e dos seus centros respectivos, ou coa de representante sindical.

Artigo 23. Convocatoria das eleccións

2.- A convocatoria e os actos derivados da mesma publicaranse no taboleiro de anuncios electrónico oficial da USC e no seu caso, nos taboleiros de anuncios correspondentes. Nas eleccións a reitor publicaranse potestativamente nos taboleiros de anuncios do Reitorado, da sede do Vicerreitorado de Coordinación do Campus de Lugo e das facultades e escolas. En todo caso, a data de referencia para os efectos de cómputo de prazos e cumprimento do disposto neste regulamento será a da publicación no taboleiro de anuncios electrónico oficial da USC regulado no Regulamento polo que se implantan medios electrónicos que facilitan o acceso dos cidadáns aos servizos públicos da USC e se crean a sede electrónica, o Rexistro Electrónico e o taboleiro de anuncios (DOG 15 de marzo de 2013)

Artigo 24. Publicación e impugnación do censo electoral

2.- As listas do censo expoñeranse publicamente nas sedes centrais da Universidade e nos centros nos tres días seguintes á convocatoria de eleccións, e permanecerán expostas durante un mínimo de cinco días. Tamén poderán publicarse temporalmente no taboleiro oficial da USC.

Artigo 25. Presentación de candidaturas

2.- As candidaturas presentaranse no Rexistro Xeral da Universidade ou en calquera dos seus rexistros auxiliares, incluído o electrónico, no horario establecido, mediante escrito dirixido ao presidente da Comisión Electoral Central, no prazo de oito días dende a publicación do censo definitivo. Tamén poderán presentarse, nas mesmas condicións, nos rexistros dos centros, no caso de eleccións de representantes nas xuntas de centro.

Artigo 48. Ponderación do voto

1.- O voto para a elección de reitor ponderarase do seguinte xeito:

- a) Sector I: profesorado doutor con vinculación permanente: 51, %
- b) Sector II: restantes categorías de persoal docente e investigador: 11%,
- c) Sector III: alumnado matriculado en titulacións oficiais 28 %,
- d) Sector IV: membros do persoal de administración e servizos: 10%

2.- (Derrogado)

4 (que pasa a 3.-). Para a ponderación do voto nas eleccións a reitor a Comisión Electoral Central procederá do seguinte xeito:

1) Unha vez coñecido o número de votos validamente emitidos a candidaturas no sector de profesorado doutor con vinculación permanente (VPD) calcularase o número total de votos ponderados (VPT), de acordo coa seguinte fórmula: $VPT = VPD \times 100 / 51$.

2) Unha vez coñecido o número total de votos ponderados (VPT), calcularase o número de votos ponderados que corresponde a cada sector ou subsector en función das porcentaxes atribuídas a cada un deles, tendo en conta que o número de votos ponderados correspondente ao sector de profesorado doutor con vinculación permanente é equivalente ao número de votos validamente emitidos a candidaturas nese sector.

3) Coñecidos os votos ponderados que corresponden a cada un dos sectores ou subsectores, calcularase o coeficiente que debe aplicarse aos votos realmente emitidos neles, utilizando catro decimais. Este coeficiente será a resultante de dividir o número de votos ponderados que corresponden a cada sector ou subsector entre o número de votos emitidos nel, e nunca poderá ser superior a 1.

4) O número de votos ponderados totais de cada candidatura será o resultado da suma dos votos validamente emitidos ao seu favor polo profesorado doutor con vinculación permanente e dos votos validamente emitidos ao seu favor polos demais sectores ou subsectores multiplicados polo seu respectivo coeficiente de ponderación.

5) En cada sector ou subsector o número de votos redondearase á unidade mais próxima. Se o primeiro decimal fose 5 ou inferior a 5 manterase a mesma unidade; e se o primeiro decimal fose superior a 5 redondearase a unha unidade superior.

Artigo 52. Sectores e subsectores

1.- Elixiranse como membros do Claustro Universitario 300 representantes dos diversos sectores da comunidade universitaria, elixidos mediante sufraxio universal, libre, igual, directo e secreto, coa seguinte composición numérica dos sectores que se indican:

Sector I: cincuenta e un por cento de profesorado doutor con vinculación permanente.

Sector II: once por cento de membros das restantes categorías de persoal docente e investigador.

Sector III: vinte e oito por cento de alumnado matriculado en titulacións oficiais.

Sector IV: dez por cento de membros do persoal de administración e servizos.

2.- O colexio electoral do sector II estará formado polas seguintes categorías:

a) *Profesorado funcionario non doutor.*

b) *Axudantes.*

c) *Profesorado axudante doutor.*

d) *Profesorado colaborador.*

e) *Profesorado asociado.*

f) *Persoal doutor contratado pola Universidade de Santiago de Compostela consonte a lexislación vixente con cargo a programas competitivos de incorporación ás universidades de investigadores e/ou docentes, sempre que o contrato permita impartir docencia.*

g) *Profesorado emérito.*

h) *Persoal investigador en formación.*

i) *Aqueloutras persoas contratadas pola Universidade de Santiago de Compostela mediante concurso público que realicen labores docentes ou investigadores e que cumpran os requisitos, entre outros os de permanencia e dedicación, que estableza o Regulamento electoral xeral da Universidade.*

3.- O colexio electoral do sector III estará integrado por todos o estudiantado da Universidade de Santiago de Compostela matriculado en titulacións oficiais de licenciatura, diplomatura, grao, máster ou doutoramento que cumpra as condicións que estipule o Regulamento electoral xeral da Universidade.

4.- O colexio electoral do sector IV estará integrado polo persoal de administración e servizos retribuído con cargo ao capítulo I das normas orzamentarias que cumpra as condicións que estipula este Regulamento electoral xeral. Así mesmo, incluírase a outro persoal non investigador contratado con cargo a outros capítulos sempre que cumpra os requisitos deste regulamento e non figuren incluídos noutro sector.

5.- Os vicerreitores ou vicerreitoras que non sexan membros do Claustro Universitario poderán asistir ás sesións con voz pero sen voto.

Artigo 54. Sectores e subsectores electorais

1.- As xuntas de facultade e escola estarán formadas

- a) No seu 51% polo persoal docente e investigador e persoal investigador en formación con docencia no centro e censado nel, así como o non censado que teña neste un encargo docente igual ou superior ao 35% da capacidade docente dun profesor a tempo completo. Todo o profesorado con vinculación permanente á Universidade, representará o 51%. O resto, non poderá exceder do 10% do total da Xunta.*
- b) Unha representación do estudantado do 32%.*
- c) Unha representación do persoal de administración e servizos censado no centro, nunha proporción do 7% do total da Xunta, cun mínimo de dous.*

2.- O regulamento de réxime interno de cada centro poderá determinar subsectores e a representación de cada un deles respectando en todo caso os seguintes límites:

- a) O persoal docente e investigador a tempo parcial non poderá representar máis do 5%.*
- b) O estudantado de grao non poderá representar menos do 20% e garantirase a representación do estudantado de máster e doutoramento cando proceda.*

Artigo 56. Sectores

1.- Sen prexuízo do disposto no apartado seguinte, o Consello de Departamento estará composto por:

- a) Os doutores membros do departamento.*
- b) Unha representación do resto do persoal docente e investigador e persoal investigador en formación, que non excederá do 10% do total de membros.*
- c) Unha representación do estudantado do ámbito de docencia do departamento, que suporá o 25% do total dos membros do Consello de Departamento. Desta porcentaxe, o 10% corresponderalle ao estudantado de grao e máster e o 15% ao estudantado de doutoramento.*
- d) Un representante do persoal de administración e servizos.*

Artigo 64.

3. A elección rexerese polo procedemento establecido no Capítulo I do Título III.

Artigos 65, 66 e 67

- Suprimidos

DISPOSICIÓN TRANSITORIA PRIMEIRA. Comisión Electoral Central

A Comisión Electoral Central manterá a súa composición actual en tanto non se produza a súa renovación, que deberá ter lugar no ano 2014, de conformidade coa composición prevista no artigo 8. No momento en que o reitor asuma a presidencia da Comisión ou designe como presidente a unha persoa distinta do secretario xeral, este asumirá a secretaría da Comisión conforme ao dito artigo 8.

DISPOSICIÓN TRANSITORIA SEGUNDA. Claustro Universitario

(Derogado apartado 1.-)

En tanto non se produza a renovación completa do Claustro, seranlle de aplicación aos seus membros as normas sobre determinación e contido dos sectores e subsectores e sobre as consecuencias do cambio de sector, subsector ou circunscrición que estaban en vigor no momento da elección

DISPOSICIÓN TRANSITORIA TERCEIRA. Outros órganos colexiados

1.- Os demais órganos colexiados de goberno que vexan alterada a súa composición como consecuencia da aprobación dos Estatutos deberán adaptarse na primeira renovación que se produza.

2.- En tanto as xuntas de centro non determinen no seu regulamento de réxime interno os subsectores aos que alude o artigo 95.2, o persoal docente e investigador a tempo parcial representará un máximo do cinco por cento do total de membros da xunta e os estudantes de doutoramento un cinco por cento de dito total.

DISPOSICIÓN TRANSITORIA CUARTA. Adscrición de titulacións

No caso de titulacións que non estean adscritas a centros, a Comisión Electoral Central poderá transitoriamente adscribir a centros os estudantes matriculados nelas co fin de que poidan votar nas eleccións de representantes no Claustro Universitario.

DISPOSICIÓN TRANSITORIA QUINTA. Titulacións propias superiores

A efectos do artigo 3.1. do presente Regulamento, no momento presente considerase como única a titulación propia de carácter superior o Diploma Superior en Criminoloxía.

DISPOSICIÓN DERROGATORIA

Quedan derogadas as normas de igual ou inferior rango que se opoñan ao contido do presente regulamento..

DISPOSICIÓN FINAL

O presente acordo entrará en vigor na data de publicación no taboleiro de anuncios electrónico oficial da USC